

Садақа қилувчи ва баҳилнинг мисоли ҳақидаги боб



21:13 / 02.05.2017 5515

243. (290). Товусдан ривоят қилинади:

«Абу Ҳурайрадан эшитдим: «**Садақа қилувчи ва баҳил мисоли темир түн кийган икки киши кабидир. Иккисининг баданлари ёки қўллари** (шак Ҳусайндан) **кўксига ёки томоғигача чирмашган.** (Садақа қилувчи) **нафақа қилса,** (темир түн) **кенгаяди.** Ҳатто бармоқларини ёпади ва (қадамининг) **изини ўчиради.** Агар баҳил садақа қилмоқчи бўлса, ҳалқалари торайиб, уни бўға бошлайди».

Абу Ҳурайранинг яна «Абу Ҳурайра ўз кўзлари билан кўрди. Расулуллоҳ соллаллоҳу алайҳи васаллам икки бармоқларини томоқларига қўйиб: «**У уни бўғади. У бўшашибтиришга уринади. Аммо бўшашмайди**», дедилар», деганини эшитдим».

Шарҳ: Бу ҳадиси шарифда садақа қилувчи сахий инсон билан садақа қилмайдиган баҳил инсоннинг ҳолати жонли тасвирда баён қилиб берилмоқда.

«Садақа қилувчи ва баҳил мисоли темир түн кийган икки киши кабидир».

Икки киши темирдан ясалган түнни кийиб олиб туришибди. Сиртдан қаралганда бир хилга ўхшашади.

«Иккисининг баданлари ёки қўллари (шак Ҳусайндан) кўксига ёки томоғигача чирмашган».

Темир тўн кийган икки кишининг қўллари йиғилиб, кўксига ёки томоғига чирмашган. Улардан бири

«(Садақа қилувчи) нафақа қилса, (темир тўн) кенгаяди. Ҳатто бармоқларини ёпади ва (қадамининг) изини ўчиради».

Сахий инсон садақа қилса, уни сиқиб турган темир тўн кенгаяди. У садақа қилгани сари темир тўн кенгайиб бораверади ва ниҳоят темир тўннинг енглари узайиб, бармоқларини ёпади, этаги эса ерга судралиб, оёқ изларини ўчиради.

Сахий одам хайру эҳсон қилгани сари эгнидаги совути кенгайиб, узайиб бориб, бутун танасини ҳимоя қилган киши каби бало-офатлардан сақланиб, натижада кўнгли ёзилиб боради.

«Агар бахил садақа қилмоқчи бўлса, ҳалқалари торайиб, уни бўға бошлиди».

Бахил эса совутининг ҳалқалари зичлашиб, бир-бирига киришиб бориб, бўғзига ёпишиб қолган одам каби ҳимоясиз бўлиб, борган сари зиқналашиб, қалби торайиб боради. У турли йўллар билан ўзига таскин истайди, аммо иложини топа олмайди.

«У уни бўғади. У бўшаштиришга уринади. Аммо бўшашмайди».

Расулуллоҳ соллаллоҳу алайҳи васаллам шу гапларни айтаётуб, бармоқлари билан томоқларини бўғиб кўрсатганлар.

Бахилликнинг оқибати ана шундай оғир бўлади. Бахилликдан қутулиш учун кўп садақа қилиш лозим бўлади.

Шайх Муҳаммад Содиқ Муҳаммад Юсуф

(Яхшилиқ ва силаи раҳм китобидан)